

雷民傳
牛應貞傳
三夢記
幻戲志
妙女傳
柳毅傳
博異志
集異記



牛應貞傳

宋若昭撰

中華書局

牛應貞傳

唐 宋若昭撰

牛肅長女曰應貞。適宏農楊唐源。少而聰穎。經耳必誦。年十三。凡誦佛經二百餘卷。儒書子史又數百餘卷。親族驚異之。初應貞未讀左傳。方擬授之。而夜初眠中。忽誦春秋起。惠公元妃孟子卒。終智伯貪而復。故韓魏反而喪之。凡三十卷。一字無遺。天曉而畢。常誦時。若有教之者。或相酬和。其父驚駭。數呼之。都不答。誦已而覺。問何故。亦不知。試令開卷。則已精熟矣。著文章百餘首。後遂學窮三教。博涉多能。每夜中眠熟。與文人談論。文人皆古之知名者。往來答難。或稱王弼。鄭元。王衍。陸機。辯論鋒起。或論文章。談名理。往往數夜不已。年二十四而卒。今採其文。題題問影賦著於篇。其序曰。庚辰歲。予嬰沈痛之疾。不起者十旬。毀頓精神。羸悴形體。藥物救療。有加無瘳。感莊子有題題責影之義。故假之爲賦。庶解疾焉。題題問於予影曰。君英達之人。聰明之子。學包六藝。文兼百氏。頤道家之祕言。探釋部之幽旨。既虔恭於中饋。又希慕於前史。不矯枉以干名。不毀物而成己。伊淑德之如此。卽精神之足特。何故羸厥姿貌。沮其精神。煩冤枕席。憔悴衣巾。子惟形兮是寄。形與子兮相親。何不誨之以崇德。而教之以自脩。異萊妻之樂道。殊鴻婦之安貧。豈痼疾而無生賴。將微賤而欲忘身。今節變歲移。臘終春首。照晴光於郊甸。動暄氣於梅柳。水解凍而繞軒。風扇和而入牖。固可觸髮釋疾。怡神養壽。何默爾無營。自貽伊咎。僕於是勃然而應曰。子居於無人之域。遊乎魑魅之鄉。形既圖于夏鼎。名又著於蒙莊。何所見之不博。何所談之不長。夫影依日而生。像

因人而見。豈言談之足曉。何節物之能辨。隨晦明以興滅。逐形骸以遷變。以愚夫畏影。而蒙鄙之性以彰。智者視陰。而遲暮之心可見。伊美惡兮由己。影何辜而遇譴。且子聞至道之精。窮兮冥。至道之極。昏兮默。達人委性命之修短。君子任時運之通塞。悔吝不能纏。榮耀不能惑。喪之不以爲喪。得之不以爲得。君子何乃怒予之不賞芳春。責予之不貴華飾。且吾之秉操。奚子智之能測。言未卒。魍魎惕然而驚。歎而起曰。僕生於絕域之外。長於荒遐之境。未曉智者之處身。是以造君而問影。既談元之至妙。請終身以藏屏。初應貞夢製書而食之。每夢食數十卷。則文體一變。如是非一。遂工爲賦頌。文名曰遺芳。